

香

字

集

刻田子乙卯稿敘

餘杭蔣灼撰

世之所忽未嘗不可惜也世之所棄未嘗不可取也
惜其所可忽而取其所可棄且又邈然若無所急於
其世而乃汲汲焉惟朝呻夕吟之是圖若予與子藝
之所爲世之人未必不有閑然笑之者矣乙卯之夏
子藝嘗語予曰昔者太上立德次立功次立言禹惜
寸陰立德也侃惜分陰立功也世固嘗以空言爲無
益而棄之者有矣吾也其忍之乎吾今年已三十有
二矣既未能潛心以探道德之原又未獲抵掌以赴

功名之會而且負樂天中年之感興安仁二毛之悲使又日而月月而歲漫然不以隙駒自惜不以雕蟲自取茲非博奕者之所不若乎吾自客歲甲寅以後當年集其所見以託於穎氏既以驗吾所言之多寡亦以徵吾所得之是非則惜陰之餘未必無一言之幾於道矣使世有見之者而覆瓿乎擊節乎指疵而合調乎吾固未暇計也語未幾忽省城有海夷之警旁掠予鄉子藝嘆曰吾縱未能立功當代寧不能自保其鄉使簡冊盡燬可乎乃首倡義立約喻父老糾鄉兵且以其事上之郡守李公公義而許之一境恃

以免禍當是時也鄉之人咸匿其貲寶之爲急而子
藝獨惟簡冊之是防守嘗咄之於故山之下曰子誠
可謂取人所棄者矣然穎氏之功雖竒其免於兵燬
者幸爾子寧能保其不終棄乎韓子嘗謂毛穎氏善
記苟使韓子而不寄之木氏焉則七百有餘之言其
絕響也久矣而況於穎乎夫今歲干在乙乙屬木歲
支在卯卯屬兎茲固所以示其微也因中山之族以
託鄧林之梨則庶乎予與子藝之所惜者爲不虛而
其所取者爲不廢爾子藝然之遂更名穎氏而正之
呼木氏而繡之

嘉靖三十五年三月九日

香宇續集

乙卯稿

吳越間田藝衡撰

文

糾集義兵檄

明興一百九十餘載世德隆乎八葉仁恩湛渥威武奮揚北伐匈奴吉囊空幕南征交趾方瀛繁組由是四夷酋長罔不嚮風慕義梯山航海恪修貢職引領企踵願效臣妾頃者春蠶爾島夷乘間竊發烏合蠭食千里雲擾沿海州郡荼毒一空父老委于溝壑子弟死于鋒鏑汙辱婦女擄掠平帛燒毀廬舍東南之禍

莫甚于此皆由承平日久民昧兵革欺我無備故得
衡行

天子赫然震怒遣重臣發各道兵往平之軍門好謀遠慮立爲圍甲之法即古者寓兵于農之意

蓋六師之賦出于井田八陣之制起于開方聚則爲

兵散則爲農容民畜衆可戰可守良法美意酌古準

今誠公私之急務保障之上策也夫何吏胥視爲虛

牘軍民狃于宴安彼此因循載胥及溺去年流賊逸

入餘杭黎庶倉皇計無所出新春以來大掠內地破

崇德殘塘棲直逼會城如履無人之境慘酷益烈所

不忍言况本鄉去賊甚近水陸皆通外無營壘之阻

內有嚮道之誘坐以待斃抑獨何哉爲此糾集義旅
保障一方揭竿長呼千人畢聚荷鋤東指挺刃相加
人懷怒心如赴私敵此皆聖世輸忠之民而亦有
司作勇之力也謹于是一月二十六日登壇告天誓衆
揚師以振先聲以防不測所有戰守科條如左但道
里遼遠險當共設掎角之勢獨力難支敢告耆老大
夫搢紳先生并四方豪傑之士各體此意宣布事宜
以身先之臨期策應寔所望也檄到施行更胥後約

喻鄉父老文

嘉靖三十四年正月十日田子馳檄糾兵間日諸鄉

父老儼然造余難曰子何少年多事也島夷猖獗三年于茲夫以海防天塹衛守星羅督以嚴詔鎮以重臣聚齊楚之兵竭府庫之財急未能靖橫波清海若每一迎敵則彼勇我怯未戰先潰破軍殺將十郡九墟此固吾子之所素聞而熟睹者也今欲驅樂生之民禦必死之寇是猶逐羸瓶以拒貪狼逞怒鐘而當奔轍也不亦難哉况曠野無城隍之險老農非師旅之壯私餉乏帑藏之積齊民鮮要束之權而廻用罔以速災輕舉以搖衆意者其殆不可乎子何少年多事之若是也田子曰惡有是哉信如父老言則是

寇不可翦而民不可衛也父老曾謂天下有不可障之水而有不可撲滅之火乎雖然此事之變常者也請爲父老陳之蓋天下之事常者易處而變者難圖大變之來必非平常之人所能濟故曰變常之端愚民瞻寒及其成功天下相安且余聞之有備無患聖人之訓也除器戒虞君子之智也臨事取困黔首之蔽也竊見諸路之民一遇有警則土崩瓦解東奔西竄卒無寧居朝去暮還終年如寄設使烽煙四起在投羅身家兩亡悔將何及余非爲一己之計而樂爲此多事也不得已耳其如父老之未諒何不然何

山不可棲何海不可浮余將去此長遯矣請諸父老
東西南北自在于是諸父老迺怡然而釋歎然而悲
毅然奮衣而倡曰子之策審矣吾將率子弟蹈白刃
冒流矢身膏草野與此賊不兩立敢不奉檄

貞義女李氏碑銘

并叙

大明嘉靖三十三年冬十一月十有二日貞義女李
京卒嗚呼哀哉貞義女者連江主簿仁和李邦相女
也幼受錢塘庠生正曰可之聘未結縭而王生夭時
京年僅十八聞訃號哭屢絕欲往手歛適父他出母
沈嚴諭止之遂制服如禮獨居小樓卒接人語斥鉛

華而不御甘齋素以苟存長掩孤影于鏡鸞未斷微
音于琴鳳三年一日矢志彌決當其時貴兒慕德富
室憐容探給百方辭婉益烈飲絕于口刃勵于心願
貧姑而從乞誓亡人以同灰再延三年於邑將逝晤
生像于一瞬追英魂于九淵聲振青雲節凌白日畢
寸心于閨闥植宏綱于宇宙嗚呼難哉夫顛沛變起
烈女所以捐軀雅素恩攀節嫋因之終一槩諸此女
千古獨行髮未結于生平穴卒同于晚後王郎之目
瞑矣李氏之譽煥乎况今封氣所值運入咸父男女
父親滌風太熾揚粵之俗無分富貧或炳未革而去

惟骨未冷而再醮生拋子息安顧舅姑禮教不能開
聖化所難牖而廼無爲而然何求自盡回茲狂漲激
彼頽風天地爲之昭明鬼神于焉感格凡有血氣者
能不爲之愴然釋名曰碑悲也余嘗過石屋之丘悲
玉樹之雙埋也特爲樹碑而銘之曰吳山越水英靈
所鍾有丈夫女歲寒青松字而未歸生從死十貞不
移天義匪經瀆貌然處子生知安行陵遷谷變獨存
者名

朝請大夫蕭山毛遠夫畫讚并叙

毛公毅字遠夫紹興蕭山人也少貧篤學領弘治戊

午鄉薦乙丑中乙榜授廣東海陽縣學教諭正德丙
子陞湖廣永州府通判旋丁父憂嘉靖壬午補福建
汀州府通判懇乞致仕銳意歸田尋陞本府同知竟
不拜命歲戊子皇上推廟號恩詔進階四品授
朝請大夫春秋八十有四甲辰年春三月八日卒于
家無嗣猶子瑚持公遺像乞讚于余迺作讚曰偉哉
朝請粵海元精豐儀碩德永錫國程一薦鄉書爲養
而仕振鐸海陽以身率士九載考最倅于永州撫携
折獄慈明用休再遷臨汀儲蓄充斥兩邑政成指民
衽席先輯彬桂後平揭陽文經武緯反側又康邊爾

引年解紳田野帝念膚功能命方下東山高臥雅志
不違崇階金紫林壑增輝觴詠優游日躋上壽天不
勅遣奪我黃耇典刑不作文獻足徵具瞻英象嶽峙
波澄猶子允宗善繼善述君子萬年有始有卒

遊五雲山記

乙卯秋八月二十四日余寓西井李鄴侯祠與徐弟
導卿約爲五雲山之遊適余赴酌吳子宗河家而徐
子亦訪盛子汝誠遂寄宿法輪禪寺越日丁亥將乘
輿獨往未及登輿會黃子惟岳吳子子明來訪聞之
躍然遂聯輿而去出湧金門而南過靈芝崇福律寺

故址蓋近爲防盗所焚也折而西南由長橋過淨慈
禪寺道經大慈月輪峯望諸山直登五雲山絕頂五
雲山去城南二十里許高數百丈五峰並峙迥出雲
霞周廻可十五里逶迤而上凡七十二灣其半分建
二亭以接足力最上爲真際院梁普覺禪師道場俯
盼長江蛇折東下沙渚廻伏間風帆烟艇若鷗泛島
翔出沒無際淀山浮山諸峰群莽赴壑若渴剗飲江
而龕赭兩山對立海濤冲逆之東南奇覽僥捷可盡
院之前有天井石覆之以亭舊稱太早不枯僧言甲
寅秋沉泉源亦竭取汲山下固其艱也飯罷舉酒數

酌其惜徐子之不與往會甫出院百步而徐子肩輿追至相對撫掌興亦劇矣復入院投齋移時而返坐第一亭北眺西湖如露半鏡雙峰髻聳足下江湖之勝此其乘之復登月輪峰入開化寺振衣六和塔之第七級塔燬已久中存宋理宗真武像康伯可等彙寫佛說二十四章李伯時觀音像俱石刻無恙又入太慈山遊定慧禪寺漱于虎跑泉味殊甘冽顧囊有佳茶惜日暮不暇奠嘗也少憇亭止誦蘇子瞻詩及宋景濂銘末終篇爲僕夫催去過發祥洞遊淨慈禪寺閣五百阿羅漢像閻麗爲五山之冠餘不及遍歷

投宿于蔣公廟衆謂斯遊也夜雨新霽秋氣正清盍登賦之朋極江山之賞雖日出而往日入而還所樂既已多矣宜爲之記以續遊史余于是乎書之

遊徑山記

徑山天目之東北山也迺天目之徑路故曰徑山一路自餘杭東入一路自臨安西入故又曰雙徑去舍西北可七十里朝夕在望未暇遊也時秋高野曠山氣益佳竊意九月九日惟此登高爲快迺先重陽三日戊戌舟行至小吳山遇雨而返己亥霽午至餘杭偕朱子大材輩縱步南湖酌徐九翁舍夜雨庚子霽

偕徐大第、第三弟肩輿由北湖渡小溪，二過仇山宿石瀨。搖良臣家晚雨，辛丑雨酌。搖良臣家命茱萸點酒，壬寅雨午霽，良臣命其子國獻相余行謁。搖相公祠即搖氏之祖也，始于三七，繼順一順三，皆爲神茲土英靈遠著。蓋郡祀焉，二里遊妙濟禪寺，閱毘陵胡漢碑，渡黃坑溪，又五里過蓬松嶺，三里過仙花山，五里過臺山，五里渡雙溪，沽酌民舍，又一里至化城舊有化城寺，五里至裏洪，十里上直嶺，過洞橋而上，可七八里，憩半山亭，蛇盤百折，眺含暉亭故址，至此可東南望長江，故又名望江亭。時日入咸池，山嶼其半，返

照射五峰間群山俯伏在半明半滅中蒼黃之景搖
移杖屢兩僕崔躍先登隔山遙聞喧呼聲風力淒冽
疑有虎至亟前詢之迺山頭濃雲斜拖飛雨驟過也
上千丈坑步急渴甚掬飲于聖水嵒水出石隙纔盈
瓢鉢味甘而香信靈液也道傍巨碑峙立者五中爲
徑山興聖萬壽禪寺大書各徑尺五乃宋孝宗宸翰
其餘皆宋元記松源僧梅公來迎日暮不及登殿過
鉢盂池其上爲鉢盂峰一名堆珠峰折而西南宿翠
雲樓癸卯雨冒雨觀龍井井在殿前月臺東下小僅
盈尺而深洞無底或云古龍湫記言龍亡湫在歲率

一來雷雨暝曠無迺其時耶階前杉杏左右傑立皆
咸通間無上手植折而東登鐘樓璠上人邀酌中峰
環秀樓登壽幻堂晚霽過梅谷一茶還宿于松源山
房甲辰雨已刻稍霽過大人峰一名天顯峰謁開山
國一禪師影堂觀靈雞塚喝石嵒嵒本一石劃而爲
三文若川字昔惠崇善觀音呪欽法師坐石屏後今
之叱破者由嵒左而上尋蔡君謨煮茶泉了不可得
大抵茲山茶佳而水亦稱諸僧苦不多蓄耳再上爲
放生池其形如月又名月池周遭闡楯埋沒荒蕪中
景悉廢矣亭中碑云爲飛戾天魚躍于淵各從其類

億萬斯年不著爲何人所題過鵬搏峰而上遊幻室
夕照復折而西下達鉢盂峰至南塔觀龍鼻水時值
久雨飛瀑如雷塔外烟霧彌布茫茫銀海了無涯涘
因顧祥僧言安得借慈航超彼岸也忽見一僧穿雲
而來衣屢畧不霑濡問之歸自臨安且云山下無雨
迺知茲山廻居雲表故沈霾晝結耳遂有歸興仍宿
于松源乙巳雨早別松源午飯于璠上人眠雲樓二
僧送至吳越王彈嵒別去至直嶺則路自己霽始信
昨僧所言之不謬也回首峰巔尚有雨絲飄墮由化
城巷而北渡大溪者一小澗者三晚酌于搖氏山莊

渡黃湖溪仍宿良臣家丙午新霽泛舟過小青坂泊
亭橋遊南山寺寺在螺峰之北由山趾折而東南觀
石佛嵒壁鐫石佛像者二十有四傍有石佛庵南山
僧鑑公邀酌晚歸己月印澄溪舟影與山光蕩漾空
明中矣丁未雨徑山四上人來訪戊申霽買舟東歸
過瓶窯鎮下西庵聞見月抵舍余惟荀卿有云不若
登高而見博昔之論徑山者率如吳沫所記以爲自
西天目龍翔鳳舞舒岡布麓蟠結而爲帝王之都者
錢塘也自東天目能騰馬奔凌深拔峭發越而爲梵
釋之宮者徑山也故蘇子瞻亦云人言山住水亦住

余始信之迺今知其不然夫天目爲兩浙主山而王氣鍾于錢塘固一山海之會也至于東天目所發諸山夾苕溪而下百里不往迺錢塘之右臂猶左臂有江外諸山也特至此而少結耳非若武林爲山之盡脈也余偶因所登覽而著其大勢不日尚須坐于西天目仙橋之頂以探其發源之何如

遊東天目山記

余自徑山回將徃天目適臨安丞陳君子言走書約余曰吾爲天目主者六年僅一遊東目而已今特命人觀介行有期吾將辭于雙目思可與共事無如

君者余欣然報可時冬十月七日也越日至餘杭九
日雨午霽遊永安寺十日至臨安遊慈勝寺會高子
德舉訪大尹魏君汝學及子言邑博方君君謨遂同
赴高子酌夜分投宿觀音寺十一日子言來訪招飲
于盛刺史南莊便道謁錢武肅王墓登太廟山前有
石室五金存者三出迎薰明遊淨土寺再南爲淨度
爲開化錢王鎖井在開化園即故宅也十二日汝學
君謨來訪僧善琴相余遊石鏡山登功德塔院淨度
僧淨月送茶至汝學招飲于官舍會盛子汝誠十三
日過竹林橋訪高子午飯于鄭子克孝家薄暮胡子

璫招飲十四日君謨招飲于官舍十五日汝學招飲于南莊步月遊淨度命淨月聯句而去四五日間錦城山水雖已遍歷而朝夕爲酒所困情欲闌矣登山之興勃勃不可復遏十六日飄然獨往午憇浪口子言數使追至會飯于程子子材家晚至紫陽宮道士止宿時天氣甚暖意明日必雨况夕照未沒猶及登山遂輕裝以繩引肩輿而上約十里至寺已可二鼓暗中惟聞風泉聲不知此身已入重雲矣十七日雨謁梁昭明太子像平溪僧怡來見亦解詩可與談者晚稍霽由寺左折而上至洗眼池此山舊名浮玉因

其高嘗居雲霧中又名雲霧山昭明分金剛經而雙
日瞽用東西兩山泉洗之各明一目故曰雙目又言
東西二池若天之兩目故曰天目云再上爲白雲西
殿雨作余步由小徑而上至分經臺方二丈許上
鼎植古松三株可琴可奕其左爲煉丹池陳君不能
從也此去大仙峰尚可五六里昏黑不及登且僕夫
啾唧相哂以爲霑衣淋面衝雨遡風而窮搜遠討且
不止殊不知我之所得形境都忘顧不在乎晴晴雨
雨也十八日雨陳子汝英來酌是夜寒甚僧言大仙
峰當有雪明日必晴十九日朝陽漏峰鐸霞光早射

函紙望絕頂果雪遂出寺過小橋者三觀西嶺垂虹
雨後更奇再下望東崕瀑布其上爲白龍池皆東目
十六景之舊也由第一亭而下遊昭明隱庵午飯于
陳典簿桂家過此十里許即爲於潛界矣

遊西天目山記

先是發臨安日魏君以公務去昌化約十九日嘗會
于西目是日遂由珠投嶺取道而上出半山亭上有
眠牛石又名眠牛亭道傍古杉一株大可七八抱蒼
翠可愛再上過真際着衣二亭轉昭明殿而東宿幻
住房遲子言不至報宿山下雙清莊矣雨後氣肅山

迥天低星月甚朗僕夫遙指山下燈火一行電掣星羅逶迤入谷隱隱如金蛇曰此臨安公車騎來也二十日拂旦由幻住折而東遊王立亭數椽方丈特據一崕壁立千仞爲一山絕奇處僧竺西獨居爲余言昨夜羣猿繞屋畏冷哀號似求依人者撫之不去余姑識之復折而西過幻住至斷崖塔院再西爲新塔院松下有亭曰悟道昔斷崖和尚悟道于此松下松甚蒼古枝榦悉成龍形雖不甚大而山中如此者亦不多得再下而西爲中峰塔院過王柱峰怪石一枝不根而生傑然支空如大將雄鎮如丈夫獨立上有

孤松偃蹇如翠葆擎蓋園輪既之再西爲鉢壠堂高
峰鉢盂尚存經張公洞側稍不可達獅子厓高峰塔
院重臺架絕壑並其下爲千丈崖撫檻闌之毛骨瘁
禁凡所稱塔院者蓋高僧圓寂之所骨殖在焉中峰
即幻住也傍午莊僧來報魏公脩於潛陳公來頤之
會于真際亭復涉高峰塔院循故道而北至斷崖與
陳君別陳君方料理遊具遂登西目絕頂絕貫而上
亦半里許穿重雲者至四層山益峻石益奇積雪未
消僕夫爭掬而灑之恍如天花飛墜僧言曾見重陽
雪此南中氣勝絕以者故其頂四面皆章也再北爲

仙橋羣石森列群梁一力衡直于上如徒杠然浮馮
太虛非人力所致洞中有一玉翰林學頗陳令璉題名
始知陳君之所以不復偕遊也奚囊有筆墨因染青
紀名東壁梯右鑿橋可以西望龍飛鳳舞歷歷可指
再西爲仙池如昭湖洗眼處東西兩泉遊者必洗目
而去相循爲故事去再西爲仙鋸石傳韋欲駕仙橋
而未就者其右高者古與廿尺或四五寸大亦如
之片扉如鋸畧無斧鑿痕厚者一寸或六七寸或
八許漸然玲瓏未破者亦縷縷如絕墨所界信鬼勞
神裂化參妙有如此者舉酒數酌海宇四空已忘

在人間世矣遠望白雲一片如車輪幅幕倏然飛來
撲人襟袂對面溟濛如隔烟霧少焉飛去復爲白雲
張袖貯之紛紜如可把握拂之則空洞一無所得如
是數度但惜不能籠繫使之凝結久住耳魏君笑曰
我輩細骨輕軀亦當乘之飛飈矣由西而下至仙殿
此地平揖蓮花峰尚二十里折而東雙石左右峙如
門闕鐫曰不二之間過嶺即爲斷崖復過幻住轉玉
立亭羣猿援樹而上可五十頭黃黑辨負相引出
澗蓋平素與僧兩忘故能不擾如此不然當由我輩
機心已盡意者猿鳥來親也徘徊久之還宿中峰二

十一日曉起登玉柱峰下初陽遙映海東紅霞如天
機濯錦橫布萬里四野白雲未歛漸露羣峰之尖如
連城如長蛇如螺髻或出或沒搖蕩于銀濤雪浪中
非丹青所能貌也下山至真際亭正見王立羣猿迴
坐檐下相對依依不忍去且列岫屏闌石如彫琢青
柯紅葉綺繡交錯分明點染一幅步幛飛泉時界其
中心目俱醒十步九回頭今日見之午飯雙清陳君
別去是夜投宿金岫民舍二十二日返臨安子言招
飲仍宿觀音寺二十三日縣尉李君維賢招飲于官
舍會主簿江君子毅二十四日魏君陳君李君來別

適東臯僧明曉來送廻度其徒一人曰如誌未爲香
火主與諸君數酌而行過餘杭抵舍日猶未暝越日
魏君書來索記余都忘其道里如夢遊仙都僅可次
其往來之日因憶天目在白玉上經爲第三十四洞
太微玄蓋之天郡志言周迴二百里高三萬九千尺
信非有宿緣者未易到也魏君曾再至東臯故不復
遊各爲寄一通且以夸未遊者

花藥夫人宮詞叙

花藥夫人姓費氏青城人幼能屬文尤長于詩以才
貌入蜀宮事後主得幸賜號花藥夫人嘗作宮詞百

首祖唐王建殊有思致後宋太祖平蜀以俘輸織室
有辨賜死王安國嘗題之曰熙寧五年奉詔定蜀民
秦民楚民三家獻書可入館者多剥脫而得一敝紙
所書花葉夫人詩筆力乃出夫人之手而詞甚奇與
王建宮詞無異建自唐至今誦者不絕口而此獨遺
弃不見取前受詔定三家書者又斥去之甚爲可惜
謹今繕寫入五館嗚呼三百篇中多婦人女子之作
采諸民而列諸經雖聖人不刪也况夫人之詩典而
雅清而麗庶可備一代之史且材情雙絕宛可想其
流風則其傳也不亦宜哉僧文瑩云親得平甫副本

凡三十二章劉貢父云一軸八九十首而存者纔三十餘篇今所傳睢陽吳氏本仁和俞氏本并雜見唐詩及賓退錄者互有不同總一百二十餘首其真贗不敢有所去取姑彙完帙以俟辨璧又敗後一篇更佳國君死社稷之義視此多媿而全蜀臣子舉出夫人下矣故亦附錄云

竹亭記

余聞鳳皇非竹不棲非練實不食昔黃帝命伶倫截竹爲筒以寫其音雌雄之鳴各六律呂以調而陰陽和虞舜張九成之樂于蒼梧之野故桂林韶音洞在

焉英皇洲前多美竹即鳳皇來儀之所也魏君汝學
嶠谷良材丹山上瑞爰構數椽于碧玉叢中池敷茵
苔闌擁篁簷素影搖秋清陰郤暑娟娟萬竿之月爽
朗千畝之風欣然會心標曰竹亭命余記之余惟森
森凌霄抱君子之操歷四時而不改柯易葉者獨此
君能之平居固不可無此君而人亦不可一日不對
此君也余嘗南遊泛西湖謁二妃祠愛其水竹幽奇
遂有不返之志惜乎未能而魏君居斯遊斯他日解
組歸田深隱于斯非若孤山之竹閣黃州之竹樓如
樂天子瞻徒寄宦興而已且汝學之心虛其節勁挺

然王立與此君雅宜而其在臨安也栽者培之荒穢
者刪之牧養元元如護龍孫犧角蓋以治竹之道治
其邑者也行將九苞文明朝陽聲振結阿閣之巢拜
渭川之爵畫錦此亭咸竹林之七賢登竹溪之六逸
爲八桂勝事矣爾時跨白鳳弄紫簫者山人也逕造
三徑當搆二君手叙歲寒之盟

玄齋銘

有叙

齋潔也閒居平心齊一思慮若齋戒然故凡素室曰
齋齋曰玄者何也玄天色也神藏不顯幽深杳冥其
無聲無臭之真乎老氏曰玄之又玄衆妙之門楊子

曰唯玄唯默守德之宅入玄之門居玄之宅者可以
安身矣銘曰心齋坐忘顏氏之子其殆庶幾聖人所
美維我斗齋名之以玄色相俱泯妙在先天

贈臨安尉李君入朝叙

邑之尉每三年輔其長朝于天子天子制也報得
失奏治否以待天官之考覈其行亦良重焉嘉靖丙
辰群辟春朝之期維時乙卯海上多故憲臣奏留有
司各守要地請以郡邑之貳代其長述職天子可
之于是臨安尉合肥李君維賢當輔陳丞行先是魏
侯索余言爲陳君賀繼而復余曰李君贈言非由子

不可非田子言李君亦不拜也余曰嗟余何能言且
余言安能爲李君重哉雖然必欲余言余不佞敢述
古之所以置尉與李君之所以善其尉者以寵祖道
在漢大縣設尉並四百石主追捕盜賊伺察奸邪及
檢覆之事明興因之臨安在杭爲劇邑山多而民
悍好勇而善鬪牧以魏侯之明敏佐以李君之勤廉
發奸摘伏無事鈞筩而民隱必彰駿駿乎絃歌成化
群罔屏跡矣邇者島夷陸梁橫行江濱窮黨西逸兩
犯疆圉黎庶震崩狼犇雉匿李君親督義勇禦于青
山以不教之民當不躬之冠主怯客武迎風披靡而

君屢陷危亡卒以策免完爾封隅市不歛肆功亦偉矣夫海塹天設險加守國鎮兵雲聚密愈防胡而廼縱之從衡養虎自噬良由賞罰不明攻守無術故也又况臨安蕞爾之邑無高城深池之利無雄師長技之衛而欲責備于一尉不亦難乎余故曰李君之功亦偉矣李君櫻大變抵要衝尚克自樹如此曾何有于狗鼠偷竊之細而已哉且李君聰明有若魏雍丘幹治不減顏安養昔人所稱黃綬位輕青雲望重余于李君復何言哉今聖天子御明堂稽王帛飭文教崇武功君執此報政當居考最余尚其有賀言

香宇續集

乙卯稿

吳越間田藝衡撰

詩

漢未央宮東閣瓦研歌

上有寧王臘仙款識

楚人一炬焦阿房
暴秦灰死炎劉允
相國獨知天子意
却鄙茅茨興未央
廼翁初嗔言即喜
壯觀四海當如此
金鋪玉砌且無論
琉璃縹瓦鎔秋水
水清泥紫昆吾工
翠鱗黃櫛輝晴空
鴟鴞展尾山川雨
燕雀高飛宮殿風
文終本是刀筆吏
埏埴盡取坑儒地
主人方欲馬上爲
此輩正宜高閣置
東閣圖書煥斗星瓦

陰皆鑄鄼侯名金莖摧折銅爵火飄落鴛鴦何限情
沙礫苔同薄蝕晉劫元塵浩無極天憐神物不灰
埃土花開處日五色南昌帝子右漢儒封爲即墨贊
訏謨常書子建求親表不寫滕王蛱蝶圖翰苑策勲
先秘府老灘厭文翻弄武陳玄毛穎散如煙獨有陶
泓淚如雨世無辨璧甘沈淪詞客何緣重結鄰莫謂
虛中成毀瓦論文猶可鳳池賓

正月七日海寇入塘棲侍從阮夫子守武林門
北門勞鎖鑰文武仗全材獨草平夷檄同登拜將臺
揮戈山日近鳴鏑海雲開莫畏狂瀾倒應看砥柱回

吳兒從軍行

吳兒輕剽不重死見說從軍欲飛起手提雙槊別少
婦自謂封侯從此始膂力過人更有材眼空冀北皆
駿駘花名獨許冠兵籍驍令先頒出外臺外臺諸侯
中執法吳越山川坐彈壓車懸七仞交龍旛帳列三
千水犀甲天吳播海波濤傾幕中若箇非長城鷹揚
虎視不敢仰談笑便可輝三精天門遙遙下明詔太
阿不意操年少請纓方鄙終子雲破敵無論霍嫖姚
將軍亦恃世無雙才斗不擊舞錦杠一任樓船衝浪
去直教繡面望風降誰知純袴不習武前戈自倒血

漂櫓雉堞狼墩勢入雲東如解瓦西崩土千人萬人
一人歸殺氣蔽日鬼火飛深閨少婦剪銀燭夜半兀
自縫寒衣

海寇猖獗糾集義兵揚師有作

郡邑幾成空能無保障功身慚一鄉望名屬萬夫雄
陣捲蛇遊霖旗翻虎嘯風從來投筆志況復抱孤忠

春草曲

暮歷江南春草肥塞下征人猶未歸遙憶爾時塞下
草戍馬齒殘根已老欲把青青寄此情夢中迷却青

青道

逆旅逢張獻叔

與子結交久道路相間之雙徑望三山千里目力疲
我獨困丘壑濩落寡相知惟子念寒素每來慰仳離
子亦不得志京國倦驅馳偃蹇守一官衣食猶不支
長江阻遊鯉尺素兩難遺錢塘春正好東風花發時
邂逅逆旅間心信面欲疑一見鮮所懽執手翻成悲
示我篋中作表我以遐思我能入子夢紀以夢我詩
我覓不憚險遠渡浙水湄子句何太異寫入梅花枝
形影良契闊精爽原有期買酒澆病骨療倒雙漏卮
市井有兼味囊橐無餘貲俛仰自宇宙世事方參差

沈醉復長去有夢還追隨

山居浚洗墨池接竹引泉入池中懸溜下注琤
琮有聲

鑿沼臨蘭砌山泉入鏡明更聰脩竹引直與釣磯平
墨向常流洗茶須未落烹冷泠金石奏風外古瓢聲

夜宴曲

華堂春暖綺筵簇珊瑚笑語鳴珠玉就中若箇知心
曲夜闌燭滅低銀河湘簾半捲明月多欲語不語愁
如何

莫折花

莫折花莫折花郎欲折花將柰何花間粉蝶愁雙蛾
插向銀餅嬌更多珊瑚倒浸金叵羅郎若愛花花解
語在樹在餅總如此樹上明年依舊開餅裏朝榮暮
還死賤妾雖有如花姿也須憑仗春風吹縱郎有春
風不能活枯枝

三月二日見雪

春事將闌不易遮故教輕雪勒殘花若干聖歷年間
見應被調羹宰相夸

采松花李四曾授余餐松法

謫仙授我餐松法漸覺年來免告饑一夜春風吹欲

老滿林朝露滴還晞花飛瑞靄浮筠籠香散黃雲染
艾衣自媿肥甘非所事山姿重與世相違

大石佛院會刻僧談禹穴山水兼期同遊因贈
西湖山水佳迺在雄藩側竟爲歌舞場煙霞損顏色
癖性厭城市相依盡名僧徙倚纜船石時見高峰燈
我師黃金軀神珠闡高論詩名期惠休道力擬支遁
謂我有空相咳吐皆青蓮摩頂灌醍醐共臨沁雪泉
歷數列中遊幽探夸禹穴崔嵬九龍山風雲千古結
了溪不通海禹鑿終神功空石沒荆棘月黑號黃熊
東南近蓬萊金堂間玉室子長命世英慷慨動史筆

便須買小艇挂席截長江當爲開闢若齋心禮法幢

山中作

山人與山雲坐臥常相依有時出山去白雲望我歸
歸來白雲悅水石生光輝他時田海變乘此白雲飛

睡起

柴門無客不須關六尺藤牀水石間夢裏忽驚松雨
集小鎰飛雪蒼花斑

雨霽間步竹林忽聞幽蘭香然山中絕無此花尋之了不可得

風轉鳥聲斷雨過山光發草際散幽香徘徊出林樾

采之阻重雲汝虛雙發沒

苦

花下有幽徑無須陣馬來雨餘常避路不敢踐

餘杭醉歌別徐大弟

餘杭好酒不醉人餘杭好花不當春似酒不花日復
夕主人有興情則親阿姥之墩在何處蒼山一望生
煙樹爲道前幾箇簡來方平長笑將歸去

有所思

所思朝復朝所思夕復夕思君君不知骨肉肉中削
花滿銀牀明色寒猿暮不敢留行跡

暮春送周元服刺開州

君溪風起花如絮春色遙遙落何處雙危還向鳳樓
飛五馬旋歸鹿城去鴻溝河外古灘淵赤壁周郎美
少年把釣逍遙臨漢水漆園傲吏有遺篇

對山

居山趣何如此病不可療人皆笑我癡人笑我亦笑
惟有山不言默然泊洞調

春暮聞鶯因憶徐伯臣言別業在嵇山下每至
出谷時新鶯可千頭如黃雲布滿綠樹亦奇景
也惜未能把酒聽之耳

送春風雨故紛紛
賴有流鶯隔樹聞
忽憶稽山山下路
翠陰如帳翳黃雲

白頭吟

莫彈綠綺琴
聽妾白頭吟
與君相結髮
不能重結心
妾頭一白難再黑
君心一黑何由白

花草士女

牡丹春去意如愁
幾度乘閒唱采蘋
療病藥生惟貝母
忘憂花發是宜男

登開元寺訪徐徵伯談玄晚歸

一別足三載
山川何處來
幽居僧舍僻
高眺海雲開

謂我增玄骨知君結聖胎
煮茶忘日暮回首翠微堆

送人遊西蜀

勸君卮酒意何長此去三巴路渺茫縱使有書傳鴈足也應飛不過衡陽

夏日郊居得工部吳明仲信有天目結社晚節同心之約

楊柳磯頭綠漲添江南梅熟雨纖纖新篁亂放渾裁徑乳燕初飛更捲簾翼闕有書惟問候郊扉無事獨幽恬風流水部懷天目朱紱青蓑未許兼

松陽徐徵君枉駕西井寺值余訪湖廣李戶曹

不遇晚閣見留手札酬謝

寄居僧舍僻不道故人來偶向龍門去空憐鶴駕回題書知爾病玄抱待余開悵望松梢月遐心未易裁

畫菜

煙芽露甲手曾栽酥雨香風長翠臺記得花間常中酒玉人親摘煮湯來

五月五日小泛西湖

客邸逢佳節依依盡友生買舟湖上去載酒日邊行蒲葉盈尊綠榴花隔岸明何須夸競渡自有木蘭輕

宮女采蓮圖

月明太液水連天荷葉荷花隱畫船三十六宮臨水
閉燭光偏照並頭蓮

種竹

遶屋琅玕夸萬玉每逢隙地更教栽平安不必山僧
報日日幽林自往來

鸚鵡

一自羈金架山林夢到賒何時能學語見客忽呼茶
翠羽棲明月紅縉舞落花樊籠總天地詞賦慢興嗟

夏日山居

濃綠衡門下幽居思更饒熟梅初過雨新竹盡凌霄

展榻清泉近前茶白石銷閒來觀物化天地共囂囂
陳臨安視餘杭篆事見過不遇寄謝

借得春風便重開下邑花遙聞仙令鳥忽到野人家
小第當除徑蒼頭解蓑茶無由延雅議歸去日應斜
閑居喜玉兒來訪晚霽遂與諸客遊山有作

掃地焚香小玉來薰風一搊夢初回燕雛雨濕飛無
力梔子陰濃花正開北海賓朋常滿座東山歌舞重
嘶杯况逢霽月涼如水莫笑高陽醉欲頹

破船板鋪山中屋

舟居無水陸居船况是虛嵒小閣懸半夜松濤搖短

夢却疑風浪大江邊

采蓮曲

人見妾采蓮不知妾尋藕池面蓮不連池心藕自翻

夏日閒居懷呂二

火輪閣西嶺回首見明月漸覺暑氣微開軒暫披髮
荷間幽香來池上涼風發拂拭白玉琴欲彈意超忽
王粲久從軍知音隔秦越冷落泉石盟沈思銷病骨

五月晦日寇攻省城

自春徂夏日兩度逼雄藩司馬豈容寇中丞惟閉門
烽煙千里遍村落幾家存露布方馳驟誰能扣帝闕

六月朔日避寇草柴坂欲移入雙溪

萬姓雲
輶東復西攜家旋亦過若溪孤舟此夜瞻烽火百口連朝逐鼓鼙長劍有靈徒慷慨空山無主可羈棲從來謾說桃源路祇恐漁人去欲迷

亂後登關外敵樓觀新操水軍

千里同其燹
樓櫓餘寒灰
寥寥吳越間
滌滌白日頽
匹馬投荒村
惆悵登孤臺
曠野鮮人居
橫尸積城隈
燎原尚未滅
瓦鎔猶燔煨
雞犬已無主
妻涼歸草萊
習習酸風生
天際漲黃埃
哭聲振林木
聞之有深哀
自哂李呻吟
灞上同嬰孩
爾士何公麻
爾馬何虺牘

閉門惟誦經安危利其災焉知保障策徒能聚民財
寇來官軍去寇去官軍來一矢不忍發前導紛後陪
迺召市井兒叱咤包禍胎白羽麾戰艦喧呼勢成雷
翻車踏飛浪合沓雪作堆戈戟耀秋霜攻擊相排拶
報國苟精誠終當九淵開伏波與樓船誰爲濟川才
我曾奮長劍招兵起田垓荼毒已切膚一揮千騎回
何以十萬師不能殲渠魁賞罰苦不申號令以爲詎
逃者亦已矣死者安在哉嗟彼建功人幸短反相媒
君門萬里遠此轂誠虛推觀變究亂始憂思不可裁
愁雲滿江山欲去重徘徊

六月二十六日海寇入餘杭村舍戒嚴

島夷無定所來往任風波遇敵誰堅壁前徒自倒戈農乘三載廢堠壘四郊多但得威明振應須奏凱歌

蕭山黃冬官汝鳴過訪兼談時事有贈

邂逅湘湖彥汪汪千頃波辭榮當蚤歲養晦及清時林竹堪脩禊菰蓆不費思邇來江海上機事正艱危

寄胡從先酒

君昔飲山醪謂有泉石味索之已罍耻酤而且相慰
村媿餽斗酒亦復流瀝氣還分高陽生幸莫較涇渭
爲問離邊花秋來開也未

五色鳳仙花

魚貫宮娥出六曹秋雲初試越羅袍鳳皇池上曾更直零落花間五色毛

長興吳子正見訪西井書房

中林蘭蕙姿傾蓋華滋媿匪公孫契寧忘季子知暑過秋雨薄茶借客察遲他日五湖上論心應有期覽九華山誌酬臨安陳子言

憶昔西江上蓬窗對九華分明移玉井窈窕出蓮花泉冷流甘露甘露泉峰危結綺霞綺霞峰因君在西道重

憶九仙家

臨安有九仙山

崑山張通政以詩冊見惠雲居寺

七十年來千里行
錢塘江上看潮生
驚濤飛雪催詩興
滿月當秋動客情
曼鑠不須鳩杖侍
風流偏稱鶴衣輕
粲然珠玉開東壁
仰止崑山北斗平

鳳尾竹

月出琅玕三徑歸
蒼煙涼露玉成圍
珮聲蕭瑟翻清影
鳳尾翩翩上羽衣

聽箏

一絃一柱怨聲含
鴈足朱絲况十三
少女不知腸斷處
故將新曲惄清酣

聞張通政與虎跑僧良縉遊天竺寺余時復登
雲居山訪之不同此賞有寄

高矣銀臺使瀟然雲水僧風塵超法相泉石構心朋
道契先天秘禪通最上乘人間無住著方外謝名稱
蘭棹憐同泛松樓喜共凭濯纓飛瀑冷振策碧山層
三竺青霞啓雙峰紫氣凝桂花香似霧竹葉綠如渑
詩老逢張說緇流得惠能聖王曾止輦佛祖自傳燈
好士推文暢高懷屬季鷹才華殊秀發海嶽可憑陵
象教常容扣龍門皆許登何期鸞節邁不借鶴音微
只尺仙樊隔遲回感慨增無由寄遐思書碎剡溪牋

朝白暮紅芙蓉一名醉芙蓉

共說紅顏成白首誰知白首變紅顏王人漸醉習池
上風露滿身猶未還

放兔

綠草青山是爾家歸時應見月生華莫夸毛穎能文
墨好避中林蕭蕭且

孤秀亭

小亭成獨坐山鳥窺幽姿孤峰出松際影落鹿角巵

留別

欲別猶未別兩情已惆悵別後儻相思記此時一唱

八月二十一日泛舟西湖觀海東龍柱

載酒西湖上正當秋霽時泛泛沙棠舟況有涼風吹
夫容水中出楊柳霜前衰翹翔鷗羽集蜿蜒龍鬚垂
直如天柱建壯似鼇極支渴虹飲巨壑瀑布注咸池
雨翻驚海立日暝信雲隨宇宙忽慘淡鱗甲皆分披
卷舒何其易變化良爲奇在淵占躍象入川應潛期
寧與魚鼈伍肯俾蛟蟻欺靈景不可測于今觀光儀
天下方文明見田能遲遲

放歸作

三十猶未遇余常憐浩然五獻五不售誰能薦甘泉

秋風吹書劍蕭瑟感壯年素業南山下不減負郭田
何事戀斗米聊爲酒家錢捫心良可笑歸去布衣穿

武林山中見采薪者

樵夫斧斤小但采拱把樹一樹大于山樵夫不敢顧

閒吟懷海上故人

郊野曾何事婆娑自不閒日高猶伏枕飯罷即登山
得句焚香寫長歌踏月還對題將有寄烽燧阻重關

步虛詞

侍女如花逐隊行就中誰是董雙成朝回環珮翻明
月片片寒光射玉京

寶鏡嘆

寶鏡雙盤龍清輝九霄徹如月三五夜團團未嘗缺
膏沐爲君除塵埃寢磨滅臨匣不忍照怕見髮邊雪
照尚不照心妾心豈緇涅蕩子隔胸腸生生易離別
孤影羞舞鸞破之比金玦

假髮曲

東鄰之女髻如雲蓬首參差困布裙西鄰之女髮如
帛假髮嵯峨垂錦綬嗟嗟世事惱殺人每每宜假不
宜真君不見東西鄰

九月十日遊徑山

秋雨秋風行路難偶乘新霽得躋攀登高已過重陽
節薄暮來遊雙徑山日近天低空海國龍飛鳳舞見
江關老僧迎客踈林下便覺歸雲意自閒

投梅公蘭若宿

昔聞梅道士花下問漁舟今見梅開士松間有鶴樓
五峰慈雨暮雙徑法雲秋心隱安禪教名傳出梵流
泉聲虛枕入山色曲闌幽願借青蓮宿還陪白足遊
無生如可學于此誓真休

喝石嵒

誠精感天地何況聞金石認得本來心泰山未爲隔

觀古龍湫示梅上人

聞香試掬龍湫水知有源從天目來欲向曹溪溯真
派我師今已熟黃梅

宿松源房連日遇雨

秋聲殊索莫何況客中聞海霧寒成雨山嵐濕作雲
未能窺色界幸好謝塵氛白足宜芒履還隨麋鹿群
遊南山寺鑑上人指十韻索詩時日暮酒酣揮
筆不加點染繼出二篇則張別駕及周大尹先
詠之矣一笑貽之不復更易

雙徑插天際嵐霧鎖重岡雨阻謝公屐飄然似歸裝

回首有遐想五峰見羨墻地主雅興同扁舟共翶翔
螺峰白雲霧始見海日光松篁夾道周齋心升鴈堂
千仞石佛嵒獨振芙蓉裳焚香坐談玄欲去仍彷徨
緬慚塵空中空門歲月長幸有住山心借宿曇花房

食蟹

左手持螯右酒卮。江南風味稻黃時。已教高築糟丘
待更乞張繇作畫師。

吊于舍人

爾本元忠後于今復陣亡將軍輕戰闘壯死宛疆場
骨共風沙朽名垂竹帛香三台山下路泉壤益輝光

曲陰徑

石蹬人跡稀秋風吹碧草爲惜麻履單落葉未曾掃

秋夜曲

清漏似從銀漢滴流螢故傍玉帳飛寒衣製得無人
寄夢繞關山幾度歸

臨安道中有懷魏汝學陳子言

寒霧作新晴藍輿溪上行沿村成曉市枯樹振秋聲
風俗絃歌化山川錦繡榮懷人心正切西望碧雲平

山陽陳子言招燕南園

賢侯閑雅燕選勝習池頭孺子榻獨下山公醉未休

鏡峰青欲暮錦水碧還秋葉月禪林古鐘聲出郭樓

遊故盛刺史南園

聞訖歸田日惟營水竹居即今亭上句猶是醉中書
落葉藏深徑聞門駐小車溪聲喧月色俯仰思何如

魏汝學中酒不能赴酌詩嘲

昔聞黃令困飛觴今日重逢魏伯陽同約南園不同
賞東籬應負菊花香

遊淨度寺會月上人同觀鎖井謁武肅王遺像
爲陳子言招燕別去因贈

白社傳聞日青山相見時扣門初出定掃壁總題詩

井鎖潛龍穴神留瑞鳳姿野翁違勝賞應媿海鷗凝

偕琴月工上人登石鏡諸山適魏侯招飲官舍

石鏡山前路兼攜二妙登赤螭方欲駕青鳥忽來徵
謂我無雙士惟君耐久朋寥寥官舍裏高眺白雲層

題觀音寺蔡應乾讀書樓

博涉群書者人稱蔡子尼長齋常對佛專席有餘師

紫竹圍書閣青松覆硯池千戈滿江上孤客益堪悲

王毋蟠桃圖爲子言慶陳毋

蟠桃之種生仙家琅玕華丹轉月華徊精玉映爲絳
李太極隱芝談眾卉三千年始一花實婉姈捧自雲

中出青鳥西來消息通令子簪紳舞前襟淮水洋洋
東海濱十洲奇樹正逢春鳳樓迢遞雙鳴去回首南
雲更憶親

魏明府招燕山亭

退食山亭吏事稀更容野客振荷衣遶闌萬井開煙
火映竹千峰擁翠微夜半當茶萋葉便秋深佐酒蠟
蠟肥黃花露冷歌鐘發月閣疎林待醉歸

薄暮同陳子言上東天目諸僧秉燭來迎

芒履登山日已曛諸天嵐霧正氤氳心遊世外渾忘
世身出雲端更入雲雙澗飛泉清韻合隔林孤燭翠

光分幸逢地主多公暇不惜遙隨白鹿群

白雲僧舍

古寺當脩竹閒門鑠白雲不須重出岫一片與僧分

分經臺

西來且葉本無文帝子言從此地分怪得曇花終不
減綸紛點破石臺雲

下東天目將往西天目道中即事

宿雨翻成雪淒其山氣清亂峰穿日影空閣應泉聲
未葉寒俱脫沙田暖易耕誰知雙目勝兼得小春行
宿幻住菴聞臨安於潛三君子宿雙清莊有懷

望裏名山近因從鳥道來月明天籟寂霜冷嶺猿哀
佛國惟真際禪心共死灰還憐三玉樹猶自隔塵埃

遊高峰塔院觀和尚所留齋鉢語錄

西目三天接高峰一鉢傳獅岩埋貌塔龍藏護珠編
絕壑窮千丈憑虛駕數椽山圍平野外樹擁小函前
猿狹啼秋雪松杉鎖暮煙孤峰擇玉柱深澗響瓊泉
吳越浮雲盡宣池落日偏寒鴉喧淨梵猛虎伴臘禪
登賦從遐覽歸依仗宿緣香厨僧飯共慧圃野蔬便
偶幸陪仙輦何堪事法筵頓忘身世隔幽思更玄玄
同魏汝學陳子言登西天目仙橋絕頂飲雪

西天目頂最高峰直上煙霞翠且重誰駕石梁留幻
跡自穿草屨繼仙蹤傳杯竒石來飛雀洗眼靈泉起
蟄龍一曲陽春餐白雪端居碧漢玉芙蓉

天目石上采得五莖靈芝二枝歸示子久

高山深谷裏信有紫芝生雲彩全三秀星珠半丸莖
遠遊曾得祕角里昔逃名此日兼盈把浮軀一羽輕
子藝自天目採芝歸

蔣灼

憊憊谷中芝珊瑚映玉枝雙莖和露採九節似雲垂
好遯非商老行歌值聖時憐君愛仙餌應與素心期

王立亭觀猿

霜葉萬山紅寒猿嘯曉風共攀危石上環坐小亭中
客狀誰能落僧餐自許同貧居煩執爨長憶魏元忠

謝臨安令惠石衣

海有紫菜木有耳水陸之珍勝甘旨不如天目石上
衣非簾非苔清且美懸厓絕壁人跡稀露華月精風
日暉自公退食足野味一筋郤療山人飢周郎生蒜
阮郎薤草膾祗破山居戒藜苋之腸此更便雖非饋
肉敢再拜

臨安懷古

衣錦山頭結綵霞荆吳勾越盡王家祇今惟有雙蝴蝶

蝶猶繞臨安陌上花

遊東西天目歸奉謝臨安於潛三明府

平生夢寐思雙目今日逢君了勝緣兩地名山皆有
主孤峰怪木不知年猿兒避冷依茅屋衲子迎香出
洞天玉立亭中更奇絕無由高臥聽鳴泉

十一月十六日遊小小洞天見甘露降松竹葉
上摘而飲之信如凝脂甘飴生平塵穢肺腸一
旦洗淨慶幸有作

仁澤聞天酒何當此降祥冬餐同沆瀣瑞應獨松算
墜葉珠生彩霑衣玉有香不須仙掌上端勝飲瓊漿

三十二日甘露降于予藝山居招飲同賦

蔣灼

忽看海上丹丘龕獨洒山中翰墨房樹樹冰珠如弄
彩紛紛芸葉盡凝香祇宜詞客分十飲絕勝金盞屑
玉筯况是此邦耆舊在定知仁澤預皇祥

洞霄石乳天日靈芝品品甘露天地瑞草木
嘉祐平生兼得感賦

已餐白玉千年髓更采青霞五色芝松竹升教承寶
露玄黃端爲發瓊滋長生何必金丹藥辟穀應須本
石姿欲把三山擬三島碧桃花下有幽期

冬日山中

山色寒更幽狂歌便獨往深林雪未銷蕨薇忽已長
余自山居回忽見魏臨安所惠馴鹿酬謝

小園何處聞鹿鹿云是使君車下來偏稱深山豕遊
者清泉碧草共徘徊

贈
詹處士席上遇雪會盛汝誠時將北上春官有

錦里看花夜荒村對雪晨山川導酒共時序一陽新
自見交情厚俱爲母黨親聖王開鬼苑抽簡待材臣

雪夜泛舟

此際不宜月蓬囱生夜暉
棹翻水葉亂并作雪花飛
宿鷺迷深岸歸鴻失古磯
酒家何處是不惜解寒衣

無題

金鴨雙眠錦瑟牀蘭膏焰永暗飛香梅花玉帳斜窺
月侍女銀鉢滿插湯歡寢不離雲夢浦多情只有杜
秋娘雕籠深鎖相思鳥三唱寒雞夜未央

飛白竹

平生冰雪操晚節更清白爲乞一兩枝樹之隱士宅

郊居即事貽縉上人

結屋遠城郭山水即比鄰農圃往來熟桑麻朝暮論

月出且鼓枻雪深行采薪幽懷若能會還寄了空入

冬夜客懷

靜夜獨坐久淒然纓余情冷月照雪色疎簾搖風聲
遠夢易以斷寒更何其清剪燭見瘦影梅花同孤橫

雪中觀華嚴會示淨逸上人

高僧轉法華趺坐白牛車栢子凝雲葉楊枝灑雪花
好開餅裹雀須救井中蛇了淨原空寂廬山許出家

雪晴

畏冷起常遲柴門午猶閉歲晏人事稀野曠風威冽
短榻晞朝暾空庭舞晴雪撫景寸心遠感古百慮結

梁園誰從遊淮蔡何時滅不聞黃竹歌忽憶剡溪別
高臥謝掃除俯衷媿寒劣沈淪壺觴間聊以藏吾拙
雨中有感寄搖雨化諸兄

三十年來尚轉蓬學書學劍兩無功數椽茅屋寒江
上一樹梅花細雨中聞鴈已知時序晚對山不覺酒
杯空高陽舊侶能相念水底雙魚尺素通

魏令汝學惠畫舫

平生把釣竿浮宅寄煙水竹葉大于舟出沒風波裏
賢侯念履險招之不可止惠我青雀艤幸不如山峙
錦繩聞乍割牙檣夸並美彩鷁欲奮飛潛蛟競遷徙

衰柳河橋隈漁磯半傾圮倏忽繫官舫鳬鷗亦驚起
野人何曾居茅屋寃未擬亟命移家具書畫頓填委
蒼頭着黃帽靄迺喧醉耳篙染秋水綠颸展夕陽紫
風便及奔馬汎汎魚千里媿無濟川楫弃置同胥靡
放浪米家船欸睍玄真子五湖稍安流夷猶從此始

雪中紅梅

素節涅不緇肯受紅塵浼偶餐絳雪丹冰霜操仍在
贈雲居福上人

八十餘年寄涅槃不離禪臘有金丹燒香火任風吹
醒施飯盂分鳥啄殘茅屋一區松葉滿衲衣百結雪

花寒山林莫道鄰城市坐對江湖即水觀

雪夜對月

滿庭玉屑映冰蟾更有梅花亞短檐忘却水晶宮夜
冷半酣猶自捲珠簾

雨夜燕集吳侯公署奉謝一首

使節初臨若水濱隨車膏雨浥輕塵絃歌俄頃成新化
談笑殷勤及故人香泛碧筒清映玉花開紅燭暖生春
夔龍禮樂方推轂須信延陵是近臣